

1 - IZVJEŠTAJ O AKTIVNOSTIMA MINISTARSTVA ZA RAD I SOCIJALNU POLITIKU NA OSTVARIVANJU CILJEVA I POLITIKE TUZLANSKOG KANTONA U 2005. GODINI

I – ODJELJENJE RADA I ZAPOŠLJAVANJA

Ministarstvo za rad i socijalnu politiku Tuzlanskog kantona je u toku 2005. godine ostvarilo maksimalnu saradnju sa svim općinama Tuzlanskog kantona i Kantonalnom Službom za zapošljavanje po pitanju rada i zapošljavanja te primjene i izvršavanja Zakona o posredovanju u zapošljavanju i socijalnoj sigurnosti nezaposlenih osoba.

U tom smislu Ministarstvo je organizovalo ili učestvovalo na sastancima koje su organizovala druga ministarstva ili granski sindikati po pitanju rješavanja statusa zaposlenika koji se nalaze na čekanju, koji su proglašeni tehnološkim viškom ili su u postupku stečaja i likvidacije ostali bez posla.

Prethodnih godina se preko ovog Ministarstva radnicima nekih preduzeća isplaćivala naknada za zbrinjavanje, ali se prestalo sa tom praksom uzimajući u obzir nova zakonska rješenja te činjenicu da je Vlada FBiH donijela Program mjera za socijalno zbrinjavanje zaposlenika koji će u procesu privatizacije, stečaja, likvidacije i prestrukturiranja preduzeća ostati bez posla, a koji provode Federalni Zavod za zapošljavanje i kantonalne službe za zapošljavanje, budući da isti dobijaju strogo namjenska sredstva za provođenje navedenog programa tj. po 20% od ukupnih sredstava ostvarenih po osnovu doprinosa za zapošljavanje, a koje pripadaju Federalnom Zavodu za zapošljavanje, odnosno kantonalnim službama i 15% od sredstava koja pripadaju Federaciji BiH, odnosno kantonu ostvarenih privatizacijom preduzeća. U tom smislu JU Služba za zapošljavanje Tuzlanskog kantona je donijela okvirni plan realizacije Programa mjera za socijalno zbrinjavanje zaposlenika koji će u procesu privatizacije, stečaja, likvidacije i prestrukturiranja preduzeća ostati bez posla.

Kantonalna komisija za implementaciju člana 143. Zakona o radu («Službene novine FBiH», broj 43/99, 32/00. i 29/03.) je u toku 2005. godine nastavila sa radom na rješavanju zahtjeva zaposlenika na uspostavljanju radno pravnog statusa. Tako je u toku 2005. godine do današnjeg dana ukupno riješeno 254 zahtjeva i to tako da je 98 zahtjeva uvaženo, 36 zahtjeva je odbijeno, dok je kod 120 zahtjeva postupak obustavljen.

II – ODJELJENJE INSPEKTORAT

Inspektorat rada u programskim aktivnostima za 2005. godinu imao je za cilj kontrole primjene Zakona o radu, općih i granskih kolektivnih ugovora, kao i Zakona o zaštiti na radu i podzakonskih akata vezano za segment rada i zaštite na radu.

U periodu 01.01 - 31.10.2005. godine Inspektorat je u potpunosti izvršio ciljeve i programske zadatke.

Inspekcija za oblast radnih odnosa i zaštite na radu je u izvještajnom periodu vršila inspekcijske nadzore kod pravnih i fizičkih lica koji se bave mašinskom, elektro, građevinskom, drvo prerađivačkom, trgovinskom i drugom djelatnošću.

Inspektori iz oblasti zaštite na radu u izvještajnom periodu su takođe vršili uviđaje zbog težih povreda na radu kojih je bilo ukupno 18. U odnosu na isti period 2004. godine više ih je bilo za 6, ali na sreću u odnosu na isti period 2004. godine, kada je bilo 6 smrtnih slučajeva, ove godine nije bio ni jedan.

Kad je u pitanju broj pregleda inspektori rada izvršili su ukupno 5730 kontrola. Zbog utvrđenih nedostataka izdato je 299 rješenja o otklanjanju nedostataka, 10 rješenja o zabrani rada i podnijeto je 90 prijava za pokretanje prekršajnog postupka.

Inspektori za oblast radnih odnosa, a povremeno i inspektori za oblast zaštite na radu kontinuirano su vršili kontrole radno angažovanih lica i u svim slučajevima, gdje su zatekli da poslodavci sa tim licima nisu zaključili pojedinačne ugovore o radu, nalagali su poslodavcima da to učine i da ih prijave Fondu penzijskog, invalidskog i zdravstvenog osiguranja.

Kontrolnim pregledima utvrđeno je da su u najvećem broju slučajeva poslodavci postupili po nalogu inspektora, tako da je u periodu 01.01 - 31.10.2005. godine legalizovan rad, tj. da je prijavljeno Fondu PIO i Zavodu za zdravstveno osiguranje Tuzlanskog kantona 852 lica, smatramo da ćemo do kraja godine uspjeti legalizovati rad 1000 uposlenika kako je to predviđeno ciljevima i politikom Tuzlanskog kantona za 2005. godinu.

III – ODJELJENJE SOCIJALNE I DJEČJE ZAŠTITE

U skladu sa usvojenim ciljevima i politikom Tuzlanskog kantona od strane Skupštine kantona, resorno Ministarstvo je uspostavilo jedinstvenu bazu korisnika socijalne zaštite, posebno osnovnih oblika koji se moraju isplaćivati u punom iznosu sukladno Zakonu o socijalnoj zaštiti, zaštiti civilnih žrtava rata i

zaštiti porodice sa djecom. Isto tako temeljem zacrtanih smjernica uredili smo jedinstven način isplate uspostavljenih prava putem pošte do krajnjeg korisnika čime se postigla efikasnost u ostvarivanju prava, ali su se i oslobodili mjesno nadležni centri za socijalni rad administriranja, a u korist stručnog rada na otkrivanju i prevenciji nastajanja stanja socijalnih potreba građana. Uradili smo provedbene akte u skladu sa Zakonom i vršimo stalni nadzor nad zakonitošću uspostavljenih prava i posrednu reviziju kroz dostavljenu dokumentaciju za novouspostavljena prava.

Na osnovu uvida u dokumentaciju dolazimo do spoznaja o nepravilnostima i vršimo neposredan nadzor u ustanovama socijalne zaštite.

Jedinstvena baza podataka i transfer sredstava prema korisnicima putem pošte, omogućili su kvalitetniji rad u centrima u svezi usluga socijalnog rada.

Urađena je cjelovita analiza stanja u oblasti socijalne i dječje zaštite koja je prihvaćena na Vladi i Skupštini Tuzlanskog kantona.

Analizom je posebno obrađena dječja zaštita, na Kantonu temeljem obaveza iz Akcionog državnog plana za djecu (period 2002 - 2010. godine). Postignut je napredak u porodičnom smještaju i stalni nadzor u institucijama socijalne zaštite kao privremenom obliku zbrinjavanja djece do adekvatnog oblika smještaja kroz usvojenje (potpuno ili nepotpuno) i smještaj u porodicu kao bolji oblik odgoja i odrastanja.

Naš model je prepoznat na nivou F BiH i šire i podržan je od USAID-a kao rješenje koje treba da se širi na postore BiH.

Uradili smo i prateće procedure procjene podobnosti porodica i porodičnog smještaja uopće. S obzirom na pristup jedinstvenom rješenju socijalne i dječje zaštite na nivou F BiH, osnivanje Kantonalnog Zavoda za socijalnu i dječju zaštitu, koji je planiran u ovoj godini, smatramo ishitrenim rješenjem i slažemo se da se odloži za naredni period poštujući državne prijedloge u socijalnoj i dječjoj zaštiti.

MINISTAR,

Prof. Vladan Remetić

2 - IZVJEŠTAJ O REALIZACIJI PROGRAMA RADA VLADE TUZLANSKOG KANTONA ZA 2005. GODINU

NORMATIVNA DJELATNOST

1. Zakon o izmjenama i dopunama Zakona o radu nije donesen, jer nije došlo do izmjena i dopuna Federalnog Zakona o radu.
2. Zakon o izmjenama i dopunama Zakona o socijalnoj zaštiti, zaštiti civilnih žrtava rata i zaštiti porodice sa djecom nije donesen iz razloga što se usvojeni Zakon na Federalnom nivou nije počeo primjenjivati.
3. Zakon o osnivanju Zavoda za socijalnu zaštitu Tuzlanskog kantona, nije donesen iako je Nacrt Zakona pripremljen, jer je u dogovoru sa Vladom Tuzlanskog kantona ocjenjeno da u ovom momentu nisu sazreli uslovi za njegovo donošenje, s obzirom da na nivou F BiH planiraju preuzimanje određenih prava iz ove oblasti.

ANALITIČKO – INFORMATIVNA DJELATNOST

1. Izvještaj o radu inspekcije rada i zaštite na radu za period I – IX mjesec 2005. godine je urađen i podnesen i isti je usvojen na Vladi i Skupštini Tuzlanskog kantona.
2. Analiza stanja u oblasti socijalne i dječje zaštite na području Tuzlanskog kantona i Program mjera i aktivnosti sa preventivnim djelovanjem je urađen i podnesen i isti su usvojeni na Vladi i Skupštini Tuzlanskog kantona.
3. Analiza stanja u oblasti zaštite djece bez roditeljskog staranja u porodičnom i institucionalnom smještaju sa prijedlogom mjera, nije donesena, jer prethodnom analizom obuhvaćen je i ovaj segment dječje zaštite i posebno obrađen smještaj u instituciju i porodice sa prijedlogom mjera.

MINISTAR,

Prof. Vladan Remetić